

Visions di scoltâ. Ideis di furlan e di Friûl te produzion musicâl contemporanie

ROBERTO DAPIT* E MARCO STOLFO**

Ristret. L'intindiment di chest contribût al è chel di meti in relazion chei che a son i orientaments gjenerâi in cont di furlan e di Friûl, palesâts dilunc vie dal Nûfcent fint in dì di vuê, e la produzion musical in lenghe furlane. E ven fate indenant une ipotesi di ricerche che e vûl viodi cemût che chês stessis ideis e visions di furlan e di Friûl si pues rivâ a cjadâlis diretamentri tai ategjamenti di soliscj e grups musicâi. Chest percors al partîs dal fat che e esist une lenghe cuntune sô individualât e cuntune sô unitât e unitarietât – la lenghe furlane – e che al esist un teritori cuntun so profil gjeografic e storic articolât e unitari: il Friûl.

Il secont moment al tocje la individuazion e la definizion, in forme sintetiche, des diviersis ideis e visions di furlan e di Friûl saltadis fûr dilunc di dut il secul passât e salacor za de seconde metât di chel di prime fintremai al dì di vuê.

Il tierç al è une descrizion di cemût che la lenghe furlane e ven doprade te produzion musical tal periodi cjacât in esam. Cheste evoluzion e ven cjalade no dome daûr des diviersis formis espressivis e dai siei protagoniscj, ma ancje cun chê di provâ a vualmâ cemût che lis diviersis visions di furlan e di Friûl si cjadâ in forme plui o mancul palese te produzion musical par furlan e tal ategjament dai musiciscj che a doprin la lenghe in musiche.

Peraulis clâf. Friûl, lenghe furlane, musiche, visions e ategjamenti in cont di lenghe furlane e Friûl.

1. Friûl e furlan. Lis premetiduris di dut il nestri resonament a son la esistence de lenghe furlane – tant che lenghe cuntune sô individualât e cuntune sô unitât e unitarietât – e chê dal Friûl, tant che teritori cuntun so profil gjeografic e storic articolât e unitari.

* Dipartiment di Lenghis e Leteraturis Forestis, Universitât dal Friûl, Udin, Republike Taliane.
E-mail: roberto.dapit@uniud.it

** Dipartiment di Studis Juridics, Universitât dal Friûl, Udin, Republike Taliane.
E-mail: marco.stolfo@uniud.it

Par ce che al tocje il Friûl nus somee che si puedi tacâ cun chestis coordenadis, che a son in chel stes gjeografichis e culturâls: al è la part plui setentrionâl de aree mediteranie, chê plui meridionâl de Europe dal centri e dal nord, chê plui a bonât de Europe orientâl, chê plui a soreli jevât di chel che al ven clamât Ocident. Chê fate indenant e je une definizion astrate e teoriche che e cjate une sô corispondence concrete sei cu la realtât dal dì di vuê sei in continuitât cu lis descrizioni dal Friûl che a son stadiis fatis dilunc vie dai secui passâts.

I riferiments a son diviers, ma il risultât al è compagn, de sentence arbitrâl dal delegât pontifici Ugo di Ostia dal 1221 a ce che a scrivin tal secul XVI il lutignint venezian Francesco Michiel, Erasmi di Valvason e Andrea Vavassore clamât Guadagnino tal test che al compagne la sô *Vera descrizione del Friuli*, stampade a Vignesie tal 1553, e fintremai ai studis fats di Prospero Antonini o ai scrits di Pacifico Valussi ae fin dal Votcent. Il Friûl al è chê part dal Mont e de Europe che si cjate tra lis Alps e l'Adriatic e tra la Livence e il Timau e cussì si palese ancje in dì di vuê, cundut che par television o sui giornâi une vore dispès cheste dimension teritorial e ven ridusude o fintremai scancelade.

In chestis e in altris descrizioni si viôt il Friûl te sô unitât, in maniere indipendente dai confins politics e administratîfs che lu àn dividût e che lu dividin ancjemò in dì di vuê. Cun di plui, une vore dispès, e ven marcade ancje une altre carateristiche di cheste tiere: dongje de sô unitarietât teritorial il Friûl al palese a fuart un profil plurâl, une varietât di paisaçs, di culturis, di tradiziôns, di lenghis (Maniacco 1996: 27; Menis 2009; Pascolini 2005).

Une spie impuantante di cheste realtât unitarie e plurâl, che intes sôs unitât e pluralitat si palese tant che alc di “altri” e di “diviers”, e salte fûr de percezion che al à di chê cui che le cjale di fûr, soreduç di soreli a mont. Un esempli si lu cjate tes pagjinis dal *Viaggio in Italia* di Guido Piovene, là che l'autôr – daûr dal rilevament dal mudament sec di un trop di elements peâts ae culture material: un di chescj al è cemût che il cjalval al ven tacât al tamon di un cjâr – al definìs il passaç de linie teoriche che e va daûr dai flums Mesc, Livence e Montican tant che il scjavaçament di une “grande muraglia” (Piovene 1957: 57). Un altri al è tes peraulis dal poete e ricercjadôr Costantino Nigra, che ancjemò tal Votcent al calcolave il Friûl “un’isola culturale intatta da secoli” e par chel al decideve di lassâle – adun

cun Corsiche, Sardegne e cun chê che al clamave “colonie straniere”, ven a dî lis piçulis comunitâts di lenghe no taliane – fûr di un so lavôr dedicât ae narative e ai cjants popolârs in Italie (D’Ancona, Bacci 1906: 69).

Il Friûl, in efiets, al è un puest “par so cont”. Al è une tiere di incuintris, di contaminazions, di scambi e disvilup di diversitâts e al è l’unic puest dulà che si incrosin lis trê fameis linguistichis e culturâls plui impuantantis de Europe: chê slave, chê gjermaniche e chê latine. Achì si cjatin adun cuatri lenghis, ven a dî il furlan, il sloven, il todesc e il talian, cu lis lôr tantis varietâts locâls. Di chestis cuatri lenghis a ‘nd è une che e à la particolaritat di jessi presinte dome achì, almancul tant che lenghe autoctone. Cun di fat, dongje de unitât dal teritori e de pluralitat di lenghis, culturis e tradizions, al è propit il furlan, te sô specificitat e te sô unitarietât, chel altri element che al marche la individualitat “altre” dal Friûl.

Di chest si visave za l’anonim viazadôr de Ete di Mieç, che la sô testemoneance si le cjate tal *Codic Vatican Palatin 965 c. 240* (Frau 1989: 3). La percezion “dal esterni” de individualitat e de specificitat de lenghe furlane e salte fûr ancke di testemoneancis plui resintis. Tra chestis – in particolâr in Italie e pe Italie – a meretin menzonadis chê che a rivin de radio, dal cine e de television taliane, là che il furlan e la sô individualitat, tant che lenghe “par so cont”, “altre” e “foreste”, a saltin fûr daûr di doi ategjaments diviers e complementârs.

Il prin al è il gust par un ciert esotism, che si palese sei cul marcâ l’incjant che al diven dal so sunâ different sei cul menâ ator cui che al dopre cheste lenghe “salvadie”, cemût che al sucêt tal film *C’eravamo tanto amati* di Ettore Scola (Stolfo 2014).

Il secont al è la dibisugne fuarte di dumiestâ e talianizâ: al è chel che si palese plui dispès. Un câs emblematic al è chel de figure dal emigrant furlan, impersonât di Gabriele Lavia, che te pelicule *La leggenda del pianista sull’oceano* di Giuseppe Tornatore al è l’unic personaç in cualchi maniere caraterizât dal pont di viste linguistic ma al fevele intune sorte di dialet venit. Par ce che al tocje la television, si pues ricuardâ cemût che, dentri di une trasmission Rai di passe cuindis agns indaûr, condusude di Paolo Limiti, dedicade a cjantis e cjançons gjavadis fûr di chel che al ven clamât “patrimoni regionâl”, a vegnин tratadis lis cjantis popolârs furlanis: *La ligrie e ven dai zovins*, par esempli, e devente *L’allegria la vien dai*

zoveni. Il fat che chest tratament al sedi stât fat in chescj câs e no, par esempli, par *Vitti na crozza* o *O mia bela Gigugin*, al pues fâ pensâ pardabon che il furlan al sedi alc par so cont e che cussì al vegni calcolât e ricognossût (Stolfo 2010: 58).

E je ancje une percezion de specificitat de lenghe furlane “dal interni”, de bande di cui che le dopre e le calcole tant che la sô lenghe. Diviers esemplis a saltin fûr de produzion leterarie, là che no mancjin afermazions esplicitis di cheste cussience, a tacâ di Ermes di Colorêt, Eusebi Stele, Jaroni Sin, Colò Marlupin e Jaroni Blancon fintremai a tancj di lôr tra i autôrs contemporanis (Begotti, Cescje 1980: 62-77; Kersevan 2001; Vicario 2013).

Cundut dai prejudizis in cont de lenghe che a son stâts insedâts tal cjâf dai furlans soredui tai ultins centecincuante agns di minorizacion, ancje in dì di vuê cui che al fevele une varietât furlane, de Cjargne, dai cuei, de plane, de Basse, dal Gurizan, dal Friûl occidentâl, al sa, in maniere sei istintive sei plui o mancul cussiente e resonade, che al dopre une varietât di une lenghe cuntune sô unitât e une sô individualitat, e di chest si inacuarç daûr dal fat che, pûr fevelant ognidun il so furlan, si rive a capisi ducj.

Di dut chest si rint cont ad in plen ancje cui che al ven di fûr, in maniere compagne dai viazadôrs dai secui passâts, e cheste percezion de specificitat e de unitarietât de lenghe furlane e ven confermade di tancj caratars, de fonologije e de morfologije ae sintassi e al lessic (Heinemann 2007; Vicario 2005).

E cussì, che si tegni cont di aspiets fonetics, morfologjics, gramaticâi o de storie de lenghe o ben che si consideri la percezion che a àn (e che a àn vût) dal furlan chei che lu doprin (o lu dopravin) e chei che no fasìn (o no fasevin) part de comunitât dai siei locutôrs, ce che al ven fûr e je une idee di unitarietât des varietâts furlanis e un sens di lontanance e adiriture di alteritât, in particolâr a pet dal talian e di chei che a son considerâts i dialets talians.

2. Ideis di furlan e di Friûl. Dilunc vie dal Nûfcnt si son fatis indenant ideis e visions di furlan e di Friûl une vore diviersis une di chê altre. Cuntune buine aprossimazion si pues meti adun chestis posizions in trê orientaments di caratar gjeneral, daûr dal ategjament che in ducj i câs al ven tignût a pet de individualitat proprie dal furlan tant che lenghe e dal Friûl tant che teritori. Achì al ven fat indenant un struc de presentazion

di chescj orientaments e di chestis visions che si le cjate plui in detai intun contribût jessût tal 2010 su *Gnovis Paginis Furlanis* (Stolfo 2010).

2.1. Negazioniscj e minimaliscj. La prime tindince gjenerâl e je chê che si podarès clamâle “negazioniste”, stant che e dinee in maniere prejudiziâl la esistence des specificitâts storichis, linguistichis, culturâls e teritoriâls dal Friûl. La fonde ideologjiche di chestis posizions e je la adesjon convinte e esplicite al nazionalism talian di marcje risorgimentâl. A pet de rigjigidât dal nazionalism classic e de sô vision par sô nature intolerante, che tal cás talian e cjatarà tal fassim la sô espression plui fuarte e plui dure, sei sul plan teoric che dal pont di viste pratic, chês stessis posizions in diviers cás a mostrin une muse diferente, che no si palese nazionaliste in maniere esplicite, ma ben si declare “progressiste” o “di bon sens” (Cavallo, Cescje 1980: 79-80). Par dutis chestis posizions il Friûl e il furlan no esistin o se esistin no àn nissune impuantance, no coventin e no je nissune unitât o unitarietât, ni linguistiche, ni teritoriâl (Stolfo 2010: 59).

Il secont orientament di caratar gjenerâl al è chel dai “minimaliscj”, stant che al cjape dentri chês posizions che no dinein la individualitat linguistiche dal furlan ni la specificitat e la unitarietât territoriâl dal Friûl, ma lis vivin dispès in maniere problematiche e contraditorie e a tindin a “minimizâle”.

Al è chest il cás dal gjornalist, politic e inzignîr Pacifico Valussi, che tai siei scrits al evidenzie la fisionomie storiche, gjeografiche e culturâl dal Friûl, ma al sint la dibisugne di rindi compatibil dut chest cu la “cause” de italianitat che e je proprie de borghesie e de *intelligentsija* furlane di in chê volte. Al è propit lui, tal 1865, l’inventôr de formule de *piccola patria*, une vore di mode par dut il secul seguitif e doprade ancjemò in dì di vuê in tancj contescj differents in maniere acritiche e cence cussience dal so significât originari, che in sù par jù cent e cincuante agns al è stât zaromai digjerit e interiorizât (DBF 2001: 659).

Cu la *piccola patria* si ricognossin lis specificitâts furlanis, ma si ur gjave vie cualsisedi conotazion alternative e indipendente rispiet a chês de *patria grande* e, anzit, chestis specificitâts a deventin funzionâls par chel nazionalism talian che des nestris bandis al è prime ireditist, dopo espansionist e infin “di frontiere”, tra *Risorgimento*, Fassisim e Vuere

Frede, cu la division de Europe e dal mont in dôs parts, une cuntri di chê altre.

A conferme de funzion politiche e des resons gjeopolitichis di cheste vision si cjatin lis peraulis di Bindo Chiurlo proferidis li dal Cjistiel di Udin ai 18 di Zenâr dal 1917, intant de prime Vuere mondiâl, e publicadis cualchi an plui indenant, tal 1922 (Chiurlo 1922), o la innomenade dediche di Gabriele D'Annunzio fate tal 1928 "Ai coraggiosi compagni de La Panarie, custodi della Piccola Patria nella Grande" che si pee in maniere direte cul titul dal libri di Chino Ermacora, *Piccola Patria* (DAF 2009/2012; Ermacora 1928). Cun di plui si fâs indenant ancje une altre etichete di meti intor di chest Friûl *piccola patria*, che e corispuint a chê che e je considerade la sô "funzion storiche": chê di *Sentinella della Patria*, cemût che al ven marcât ancje dal titul dal film dedicât al Friûl fat di Chino Ermacora tal 1927 (Ellero 2004: 82).

La vision de *piccola patria* e cjape dentri ad in plen ancje la lenghe: la idee di furlan che e ven fûr e je chê – si podarès dî – di une *piccola lingua*, di doprâ dome tal cjant popolâr e te poesie, massime in chê che e esalte lis virtûts tradizionâls dal furlan "salt, onest, lavoradôr". Cussì, intant che in Catalogne l'Institut d'Estudis Catalans cun Pompeu Fabra al jere daûr a meti adun un imprest linguistic moderni e eficaç, bon par ogni setôr e par ogni occasiun, Ugo Pellis al invidave i furlans "a scrivere il friulano da italiani" e a fâlu "nella parlata del luogo natio senza riguardo alla tradizione di altre località" (Salvi 1975: 148).

Ator di chestis ideis di lenghe, culture e identitât si veve dade dongie la plui part dai inteleetuâi furlans. Cheste e je la impostazion che e ven dade a chê che e ven calcolade la istituzion culturâl plui impuantante di chenti, ven a dî la Societât Filologjiche Furlane, nassude no par câs ai 23 di Novembar tal 1919 a Gurize, cemût che al ven fûr di chês che Gianfranco Ellero al clame "grandi ed esagerate professioni di italianità" fatis "fin dal primo giorno" de bande dai siei sorestanti (Ellero 2005: 337).

Ponts di viste compagns si regjistrin ancje in temps plui resints e in plui contescj, tai studis storics e linguistics, te divulgazion dai lôr risultâts, tal dibatiment sui mieçs di comunicazion e in cjamp politic e soredut inte impostazion di chel dibatiment, no dome fintremai ae fin de Vuere Frede, ma ancje dopo. In chescj câs il nazionalismus di riferiment nol è ni chel iredentist, ni chel espansionist, ni chel "di frontiere", ma salacor un

“neonazionalism” talian che al è sintesi di chei, tai siei contignûts di fonde, e al è une sorte di reazion culturâl e politiche viers de gnove fase de crisi dal Stât nazionâl, tra vecjis e gnovis pôris de diversitât e cun vecjis e gnovis bariduris di fâ sù.

Propit chest al è l'element comun di ciertis posizions che si pues insuazâlis sei dentri dal orientament “minimalist” sei, almancul in part, dentri di chel “negazionist”. Chescj ategjaments viers de lenghe a mostrin dispès une muse “biele”, “amichevule” e “dolce”, stant che no si declarin cuintrî de lenghe, ma anzit a motivin che i vuelin ben, tant che “lenghe dal cûr”, “lenghe dai afiets”, “lenghe arcaiche”, “lenghe de memorie”. Però, propit su chestis fondis, i dinein la pussibilitât che e sedi une lenghe “normâl”, che si pues doprâle in dutis lis formis e par frontâ ducj i argoments, che si pues insegnâle e doprâle tes scuelis, che si pues doprâle tai media e te societât e che si pues scrivile daûr di cualchi regule di grafie e di gramatiche.

Ducj chescj ategjaments in cont de lenghe si pues calcolâju tant che aspiets di une tindince gjenerâl, che in manieris dome in aparence diviersis e viôt il furlan tant che alc che al è subordenât rispiet al talian e che e da acet, se no che lis promôf, a chê dinamichis che a puartin ae diglossie e a dilalie (Dell'Aquila, Iannaccaro 2004: 181) e che, doprant il lengaç des sciencis sociâls, si pues definilis “opression linguistique” e “jerarchie des lenghis” (Canciani, De La Pierre 1993: 9).

2.2. I orientaments “positifs”. La individualitât linguistica dal furlan e la unitarietât teritoriâl dal Friûl a son la fonde anje par chel che si pues ricognossilu tant che il tierç orientament. Si pues clamâlu “positif” no par dâi un judizi di merit, ma par vie che al ten dongje ategjaments là che lis specificitât linguisticis e chê teritoriâls no son dineadis ni minimizadis, ma ur ven dât ad in plen acet e ricognosiment. In cheste suaze si cjatin diviersis posizions, anje une vore differentis, che però no pierdin di viste il fat che e esist une lenghe, che al esist un teritori e, massime in cualchi câs, che e esist une storie che e je stade platade e che si à di recuperâle, cemût che al salte fûr di scrits e iniziativis di tancj di lôr, a tacâ di Josef Marchet (Marchet 1994).

In cont de lenghe furlane e de cussience de sô individualitât o vin za ricuardât alc par ce che al tocje la produzion leterarie. Si pues zontâ

ancjemò alc in cont dai ûs publics: de prose tecniche e dai manifescj tal Friûl Gurizan tra il secul XIX e il secul XX al giornalism di informazion e opinion dut par furlan dal *Floreat dal Palazz*. Cun di plui, a meretin menzonadis diviersis iniziativis inviadis tai agns ator e dopo dal prin conflit mondiâl, a tacâ dai studis e dai scrîts di Achille Tellini, che al mostre une cussience precise su la lenghe dongje di doprâle, su *Patrje Ladine*, par scrivi dal Friûl e dal mont (Mauro 2005; Salvi 1975: 149; Toffoli 2007a).

Propit Tellini al palese une vision culturâl e politiche di Friûl e di furlan che e je diferente e alternative rispiet a chês fatis indenant des posizioni negazionistis e minimalistis: il Friûl, impen di jessi *Sentinella della Patria*, al ven calcolât tant che une potenziâl oasi di pâs, framieç dai diviers nazionalisims imperialiscj, e la atenzion pe lenghe furlane e je la atenzion par dutis lis lenghis, massime chês minorizadis (Toffoli 2007b).

Sù par jù ta chei stes agns, e in particolâr tal 1920, al è cui che al fevele, che al pense e che al scrîf – Bindo Chiurlo cun fastidi; il sfuei socialist *Il lavoratore friulano* almancul in part ancje cuntune cierte cunvinzion – in cont di une “repubblica friulana” (Toffoli 2005). Ancjemò di prime si fasin indenant chês che Chiurlo al clame, in maniere critiche, “idee autonomistiche”: in chest sens il discors (fûr temp massim?) di Giuseppe Bugatto li dal Parlament di Viene ae fin di Otubar dal 1918 al è par sigûr un pont di riferiment, compagn che lis iniziativis cjapadis sù di lui e di bons. Luigi Faidutti prime e intant de vuere e dal scrit di Tellini publicat sul *Tesaur de Lenghe Furlane* tal Novembar dal 1919, là si pues cjatâ une sorte di vêr e propri program politic nazionalitari furlan (Tellini 1991).

Par sigûr di in chê volte fintremai al dì di vuê, la plui part des iniziativis di caratar politic che a tocjin l'autoguvier dal Friûl, pûr inte diversitat dai orientaments culturâi e ideologjics (plui o mancul progressiscj, plui o mancul conservadôrs, di ispirazion religjose o laiche), si fondin suntun ategjament positif viers de individualitat linguistiche dal furlan e di chê teritorâl dal Friûl. In chest sens, tra produzion culturâl, comunicazion, organizazion e mobilitazion sociâl, si pues vualmâ une convergjence di sensibilitâts diviersis propit in relazion cu la lenghe furlane e cu la dimension gjeografiche unitarie dal Friûl. In particolâr, par ce che al tocje il furlan, cheste vision lu calcole tant che valôr identitari e tant che element distintif (lenghe “nestre”), tant che imprest di doprâ inte comunicazion,

inte societât e duncje di imparâ e di doprâ ancje tes scuelis (lenghe “lenghe”) e tant che dirit dai furlans, di ricognossi e garantî cun istituzions, risorsis e intervents di pueste (lenghe “dirit”) (Begotti, Cescje 1980: 117-118; Cavallo, Cescje 1980; Roseano 1997 Strassoldo 1996; Stolfo 2010, 2011a, 2011b).

3. Furlan in musiche tra une tradizion e chê altre. La produzion musical si pues calcolâle no dome tant che fat culturâl e salacor artistic, ma ancje tant che fat sociâl. In chest sens la musiche e devente un spieli di ce che si môf inte societât e de atividât di soliscj e grups che a doprin la lenghe furlane a saltin fûr, ancje in maniere implicite, elements peâts cui diviers ateggiaments mantignûts viers de lenghe furlane e dal Friûl.

Cui che al sune e che al cjante par furlan, almancul a tacâ dai agns Sessante dal secul XX al dì di vuê, lu fâs cun motivazions e cun ateggiaments diferents. In gjenerâl si pues osservâ che al è cui che al fâs riferiment ae cussì clamade tradizion (e al considere la lenghe, in particolâr chê doprade tai tescj des cjançons popolârs e de tradizion orâl, une parte di chê) par riproponile o par studiâle, cui che al partis de tradizion par miscliçâle cun altris sunôrs e cui che al partis de lenghe par doprâle cun tancj e diviers lengaçs espressifs.

Si fasin indenant dôs ideis diviersis di tradizion. Di une bande e je chê che si pues clamâle tradizion “cognossude e propagandade”. Al è un patrimoni “tradizionâl”, che al è selezionât e che al piert lis sôs funzions comunitariis, calendariâls e rituâls: al ven tratât cuntune ande tradizionaliste e cjamât di elements di inovazion e artificiâi, che però a vegnин calcolâts origjinâi e tradizionâi: il cjant corâl daûr dal model dal “côr alpin”, praticât di grups che a àn sù par jù ducj chel stes repertori cun chê stesse armonizazion; il bal che al ven fat dome di grups di balarins “specializâts” in costum folcloristic, “in divise”; la cussì clamade *villotta d'autore* (Rossi 1979).

Di chê altre bande si cjate une altre tradizion, che e je “dismenteade” e tignude in bande e che dome cualchidun, musicist o studiôs (un non par ducj: Gilberto Pressacco), al torne a discuvierzi, a studiâ e a meti a disposizion di ducj (Paluzzano, Pressacco 1998 e Pressacco 2002a, 2003, 2005, 2007). Cheste e ten dongje lis formis dal cjant spontani e i siei tescj, il bal che si compagnave cul cjant, lis pussibilis divignincis mediteraniis e la

funzion terapeutiche e estatiche dal bal e dal cjant ae furlane, i leams tra musiche e rîts plui o mancul antîcs, eresiis e sincretisims (Stolfo 2011b: 33-37).

Une distinzion di cheste fate e mostre che za in partence e esist une divaricazion tra visions differentis. La tradizion “cognossude e propagandade” e je coerente e salacor funzionâl cun chês visions di furlan e di Friûl che o vin za definidis “minimalistis”, daûr di une tindince che intal cjamp de musiche popolâr si fâs indenant ancjemò a tacâ de fin dal Votcent, cui tescj des cjantis che a vegin dumiestiâts sei par ce che al tocje la lenghe che pai contignûts, fintremai cu la censure di chês che a son satirichis o che a tratin argoments sociâi e che no rivin a stâ dentri tal cliché ideologjic dal furlan “salt, onest, lavoradôr” e de *piccola patria*.

Al contrari la tradizion, che par vie dal so jessi stade metude in bande si pues clamâle “platade”, e devente, sei par chest che ancjemò di plui pes sôs carateristichis sostanziâls, un pont di riferiment par chês iniziativis artistichis e culturâls che in maniere plui o mancul direte a son in sintonie cuntun ategjament positif e alternatif.

Di cheste situazion di partence al diven chel che, in maniere implicite o esplicite, al è l'ategjament viers de lenghe furlane e viers dal Friûl che al ven pandût di tancj côrs e grups folcloristics. Al è tendenzialmentri “minimalist”, stant che la lenghe furlane – se e je – e risulte dome che un ogjet o un sunôr e il Friûl fat indenant al è un pôc “cartuline” un pôc Arcadie, un pôc tiere di vueris e di confins, “sentinella della Patria” par dutis lis stagjons. Cheste ande e je compagne ancje cumò: si lu viôt a clâr tes formis di publicizazion di events e concors corâi e folcloristics.

No si slontane di cheste vision di fonde nancje la componente plui dinamiche di chest panorame: chê dai sunadôrs di violin, liron e armoniche, che a misclicin la tradizion des bandelis e altris formis di intratagniment. Al è però interessant viodi cemût che, in maniere implicite, propit par vie dal repertori che al ten dongje baladis e altris tocs par furlan tradizionâi o origjinâi, staiaris, valçs di diverse divignince, polchis, tangos, tocs slovens e carinzians e altris musichis di sagre che a van daûr dal model sloven-carinzian *oberkrainer*, chescj grups e soliscj – chei plui innomenâts a son il Trio Pakaj e i Bintars e plui indenant, sorelut tra i agns Setante e Otante ma ancje in temps plui resints, Popovič, Folketitrai e Doganîrs – a rapresentin in cualchi maniere ancje bocons di Friûl “plurâl” (Bintars 1978; Doganîrs 1999; Folketitrai 1980; Popovič 1979).

4. “Ideologia friulana” in forme di cjançon? Tai agns Sessante al cjape consistence anje un altri mont di musiche par furlan che un pôc si lee cun ce che al esist bielzà – côrs, balarins e formazions di folk – e un pôc al nas e si disvilepe intune altre direzion, lant daûr dai modei de cjançon melodiche taliane, de cjançon-cabaret e de cjançon di autôr. Un fat impuantant in chest sens al è l’inviament dal Festival della canzone friulana, rassegne che e nas tal 1959 a Pradaman, si sposte par un an a Maian, e torné a Pradaman cun cjadince anuâl fin tal 1972 e di in chê volte e va indenant cence une vere regolaritât, ni di temps ni di “location”, par tornâ fûr tal 2010 e tal 2012 (Cossar 2010).

Il Festival al partìs par iniziative di Scuele libare furlane, agregazion di leterâts e insegnants, che si veve dade dongje a tacâ dal 1952 propit par dâ ae lenghe furlane plui spazis inte scuele e inte societât (Ulliana 1982). L’event al ven inmaneât cun chê di promovi il furlan e la creativitat inte lenghe tal cjamph de cjançon. Si podarès calcolâlu une sorte di “Sanremo” furlan, intune ete là che il Festival de cjançon taliane al è pardabon un dai events plui impuantants a nivel statâl. La manifestazion e ten dongje vôs furlanis e protagoniscj de cjançon taliane di chei agns, tant che Memo Remigi, Pino Donaggio o Wilma De Angelis, che in chê occasion, ospits speciai, a cjantin anje par furlan (Zampa 2010).

Massime tes primis edizions, il Festival al è alc e ce, par vie dai siei tancj ospits che a rivin anje dal teatri e de television taliane. Par dutis chestis sôs carateristichis, però, la iniziative e palese une muse provinciâl e soreduòt si mostre une vore debule pe promozion de lenghe, cemût che al salte fûr a clâr anje dal so titul che al è simpri e dome par talian. Chescj aspiets a son ancjemò plui evidents tes edizions dal 2010 e dal 2012, stant che il contest al è cambiât: chel gjeneral e chel de musiche, dal spetacul, de lenghe furlane e de produzion culturâl e musical par furlan.

Chel Festival al met in circul musiciscj e cjantants, che in chei agns a deventin protagonisti di sagris e di altris events di paîs ator pal Friûl, rivant a ciatâ spazi, cualchi an plui indenant, anje tes primis televisions privadis. Cun di plui, compagn che a Sanremo, e salte fûr anje cualchi propueste mancul convenzionâl.

Côrs, balarins, sunadôrs folk e cjantants melodics in chei agns a àn un ciert succès. Si cjatin a dâ une rispueste, une vore parziâl, a chê dibisugne gnove di furlan e di musiche par furlan che in chê volte si palese in

maniere avonde fuarte e sparniçade, un pôc dome par esprimi une identitât che si à pôre di pierdi, stant che si calcole che e sedi menaçade de modernizazion rivade ancje achì, un pôc cun chê di afermâ une cussience in tiermins positîfs propit par vivi “di furlans” cheste modernizazion. Chê stesse dibisugne e cres dopo dal taramot dal 1976 e la ufierte de musiche par furlan e compagnie almancul in part la difusion di une cussience identitarie gnove, che e salte fûr in chei agns (Rossi 2009).

Daûr di une iniziative tant che il Festival e almancul in part ancje de rispuoste dal public e sarès ancje une vision “positive” di lenghe furlane e di Friûl, ma il risultât al è un altri: “minimalist”.

In chest contest a saltin fûr diviers personaçs e in particolâr a son doi di lôr che a varan un succès particolâr e a segnaran il panorame de musiche par furlan e soredu la sô imagjin par un grum di agns. Il prin al è Beppino Lodolo, che si pues calcolâlu une sorte di Claudio Villa nostran, il *reuccio* de cjançon melodiche furlane che e va daûr dal model talian. Il secont al è Dario Zampa, che il so non, a tacâ dai agns Setante, al devente sinonim, par tant timp e par tancj di lôr, di cjançon par furlan e par cualchidun fintremai di lenghe furlane *tout court*.

Chê di Dario Zampa je une figure impuantantone, che e ten dongje caratars di inovazion e di conservazion. I prins si palesin te capacitât di scrivi e di cjantâ in maniere semplice e direte e intune lenghe sclete e te sô imagjin, che e je sù par jù compagnie di chê di tancj cjantants talians di chei agns e in chest sens e je “moderne” e lontane dal imaginari folcloristic “tradizionâl”.

Dongje di chescj elements a'nd è ancje altris, là che la inovazion e va al mancul, e a tocjin la forme e i contignûts des sôs cjançons. I siei tocs a van daûr dal model de cjançon melodiche taliane “sanremese”, ancje se tai prins trê albums a son plui concrets e arûts, cuasit “cjantautorâi”. I tescj a àn une buine capacitât descriptive e evocative, si fasin preseâ e cjantâ a memorie, ma a ufrissin un imaginari che al va daûr di chê vision di Friûl e di furlan che le vin clamade “minimaliste”.

Cun di fat, il Friûl des cjançons di Dario Zampa al cjale simpri indaûr, si rapuarte, magari cun difidence, dome cu la dimension taliane, in tiermins sei culturâi che politics, e al starès miôr par so cont, ma “cidin, cuiet”, magari platât sot de cotule di “Mariane” (che impen lu mostre cence pudôr, stant che e je “Masse furlane”, cemût che al salte fûr di une

sô cjançon) (Zampa 1979). I furlans dai siei tescj ogni tant a alcin ancje il cjâf, si lamentin, si inrabiin, cul podê in tiere e cun Diu in cîl, ma ae fin a cedin, a molin, a acetin, a domandin di vê fuarce par resisti, par “crodi ancjemò e no cambiâ nuie”.

Par Stiefin Montel, une des vôs dai Mitili FLK, che a saran i prins protagoniscj de “gnove musiche furlane” tai agns Novante, la espression di cheste *Weltanschauung* e ven fûr ad in plen dal test di *Parcè Signôr*. In *Viaç a scjavaçâ la gnot*, il radiodrame dal 2010 dedicât ae storie de cjançon par furlan prontât di Montel e di Cristina Mauro, sô compagne tai Mitili, chel toc al ven definît un model di cjançon “vertical” cul om furlan piçul, sotan, abàs, in zenoglons, e il podê, in chest câs fintremai il Signôr, lassù indalt che al comande e che al dispon.

In cualchi câs, però, Dario Zampa al scrîf e al cjante ancje cjançons che mostrin un ategjament plui critic e problematic: un esempli su ducj al è chel dal toc *Delusion di un emigrant*, che si slontane in maniere interessante di une cierte retoriche “minimaliste” almancul in cont dal teme de emigrazion (Zampa 1978).

La vision nostalgie e duncje minorizade di furlan e di Friûl e je dut câs il caratar comun di tancj di lôr, massime chei che, tra une melodie, une armoniche, une parodie, un côr e un grup folcloristic, a rivin a vê ancje un ciert succès, cun cassetis, discs e spetacui ator – di Sdrindule a Titiliti, di Enzo Driussi a Toni Merlot – che in cualchi câs a doprin ancje mascaris tipologjichis comichis par rapresentâ contadins un pôc ironics, un pôc dordei e magari ancje cjochelis (Rossi 2009).

Al ven di domandâsi se dut chest panorame nol sedi une rappresentazion, in forme di cjançon, di chê che Tito Maniacco al clamarà “ideologia friulana”.

5. Tradizion “platade” e cjançon orizontâl. Tai agns Setante la lenghe furlane e scomence a vignâ doprade in musiche ancje par contâ il Friûl e il mont intune maniere gnove, curiose, vierte e no convenzionâl, sei cjalant in direzion dal passât, sei soredui cui voi – cu lis orelis, cul cûr e cul cerviel – pontâts su la contemporaneitât e sul avignâ, su ce che al sucêt in Friûl e pal mont. Cheste strade e ven batude in trê manieris diviersis che, *a posteriori*, daûr di cemût che e salte fûr chê realtât articolade che e ven clamade “gnove musiche furlane”, si pues considerâlis in cualchi maniere complementârs.

La prime e je chê dai cjançonîrs: il Canzoniere Friulano e soredu il Canzoniere popolare di Aiello o “Canzonîr di Dael”. A scomencin la lôr attività sul prin cricâ dai agns Setante e a van daûr di un model che za tal deceni prime al esist e al à un ciert sucès ator pal Stât talian. Al è chel dai grups che si movin tra cjançon di autôr cun contignûts politics, versions cjantadis di poesiis di tai sociâl o esistenziâl e riproposizion di cjançons populârs che a tocjin i temis des lotis operaris e contadinis, e lu fasin doprant i dialets e lis lenghis “altris”.

Al merete ricuardât che une forme di cjançon militante, in chei stes agns, e ven praticade in maniere autonome, doprant lis lenghis minorizadis, ancje in altris zonis de Europe, dal País Basc e dai País Catalans ae Ocitanie e ae Bretagne. Dut câs, almancul in partence, e si lu capìs ancje dai nons dai grups furlans, il riferiment pai cjançonîrs di chenti al è dome chel dai *canzonieri* taliants e la sô conotazion politiche e je di orientament progressist ma no je ancje nazionalitarie.

Il “Canzonîr di Dael” al recupere sonoritâts e melodiis de tradizion, al sgarfe tra i tescj de tradizion “platade”, comprendûts i viers par furlan dal “pridicjadôr socialist” Zuan Minut, al recupere il Pasolini furlan, al stramude in cjançons lis poesiis di Galliano Zof e Leo Zanier – che al ven metût in musiche ancje dal Canzoniere Friulano – e al tire fûr ancje tescj origjinali che a fevelin di passions, di emigrazion, di dirits, di memorie e di antimilitarism. Tra lis ricuelts *In onôr e in favôr* (1978), *Duc' o quasit* (1979) e *Dut di bant* (1985) e la uniche publicazion omonime dal *Canzoniere Friulano* (1978), a vegnин fûr la vision di un Friûl che al vûl resisti ma par cambiâ in miôr e no par acetâ cidin, e une maniere di doprà il furlan in musiche che e je di plante fûr diferente di chê cognossude fin in chê volte: urgjence comunicative, poesie sociâl, contemporaneitât, disincjant, vôs, ghitarris, sunetis, flauts, mandulins e tintinis, dibisugne di meti in discussion l'armamentari ideologijc doprât cun efiet di moltiplicadôr dai media e de *intelligentsija* di chenti in maniere conformiste e convenzionalâl.

Al è sù par jù compagn l'ategjament in cont di musiche, lenghe e Friûl che al ven mantignût di Giorgio Ferigo e dal Povolâr Ensemble, che pes sôs carateristichis si à di considerâlu par so cont rispriet ai cjançonîrs, cun dut di tancj elements in comun.

Par chest grup si pues fevelâ di une seconde maniere, tra i agns Setante

e i agns Otante, di semenâ rinnovament inte musiche furlane e par furlan. La forme e il contignût a cjapin dentri in maniere origjinâl tescj par furlan e riferiments musicâi diviers, tra rock, folk, jazz e cjantautorât francês, american e talian, cemût che si pues scoltâ in *Il temp das radîs* e *Cjamp dai pierdâts amôrs*. Dongje di chê “vertical”, par creâ une altre categorie interpretative che e va daûr di chê suggeride di Stieffin Montel, e rive ancie la cjançon orizontâl: contemporanie, contaminade e in stât di doprâ la lenghe par ducj i argoments e in prospetive cun cualsisedi lengaç musical.

Chel che al ven clamât, in gjenerâl, *folk revival* al rapresente la tierce forme di rinnovament de musiche par furlan. Cheste strade e ven vierte de bande de Sedon Salvadie, un dai grups furlans plui cognossûts e preseâts ancjemò in di di vuê. In chest cás, a difference che pai cjançonîrs e pal Povolâr Ensemble, i tescj (e cun chei la lenghe) a son mancul impuantants: a son plui sunôrs che significants e significâts. Ta chei altris cás, invezit, lis peraulis, origjinâls o di altri autôr o di divignince popolâr, a àn une impuantance par so cont e e je la musiche a lâur daûr, cussì l'ús de lenghe furlane al è un fat che al diven di une sielte, istintive o resonade, che e je expressive no dome su la fonde dai siei sunôrs, ma soredut in tiermins comunicatîfs, funzionâi (il lessic) e simbolics (la lenghe proprie, la lenghe dal popul, la lenghe de int, la lenghe che si pues doprâle par cjantâ di dut e cun dut) (Ferigo 1999; Stolfo 2012a).

6. Viers la gnove musiche furlane. La semence di chê che di passe vincj agns e ven clamade gnove musiche furlane, tes sôs milante formis e espressions, si cjate propit in chês esperiencis gnovis saltadis fûr tai agns Setante. Par butâ, cemût che e fasàrà a tacâ dal ultin deceni del secul passât, i coventaran temp, aghe, concim e lavôr dal teren. Dut chest al ven metût dongje vie pai agns Otante.

Chest al è un temp di transizion, segnât in Friûl di ce che al ven dopo dal taramot dal 1976, che al marche, in tiermins sociâi, culturâi, politics e economics, un passaç epocâl par dut il teritori, des monts al mât. Al è ancie il temp di chel che al ven clamât disglaçament des relazions tra i Stâts Unîts di Americhe e la Union Sovietiche, che in chei agns al è segnât di aceleradis e frenadis continuis che a àn rivocs particolârs in cheste tiere di confin, plene di casermis e di altris servitûts militârs.

E par ce che al tocje la musiche, in gjenerâl, al è il moment des milante

derivazions de scjassade dal punk e des gnovis formis di espression che a saltin fûr inte black music, cul hip hop e cul rap, intant che il reggae gjamaican al mostre za di cualchi an che al è spazi ancje par altris tradizions e lengaçs.

Al salte fûr alc di gnûf e di inovatif ancje intal panorame de musiche par furlan. Al rive *La Gnoie Lune*, il concept-album di Raul Lovisoni, che al messede epiche fantastiche, melodie e sperimentazions. E soredut al esist, a tacâ dal 1980, un gnûf mieç di comunicazion là che il furlan e je lenghe di dut e di ducj e là che la musiche e à un spazi impuantant: Radio Onde Furlane.

Propit di chê che si presente tant che la “radio libare dai furlans” al salte fûr il Premi Friûl, concors metût adun tal 1984 cun chê di promovi la lenghe furlane e la creativitat in lenghe furlane in diviers cjamps, de grafiche ai radiodramis, de fotografie ae musiche, che in cheste suaze e devente il setôr che al ven batût cun plui costance e cun plui sodisfazion, ancje daûr dal numar, de varietât e de qualitât des propuestis.

I intindiments, massime pe sezion “Cjançons”, a somein sù par jù compagns di chei di Scuele libare furlane tal inmaneâ il Festival della canzone friulana tal 1959, dut câs a son un grum di diferencis, a tacâ dal titul che al è dome par furlan, che a divegnin sei dal contest gjenerâl sei di une vision plui moderne de lenghe e dal ûs de lenghe, che si fonde ancje su la esperience de Radio di chei agns. Stant che la competizion e je pes cjançons, al Premi a cjapin part côrs, grups folk, cjantants melodics, cjantautôrs e grups plui o mancul rock, ma cul passâ dal temp a son propit chestis ultimis dôs “categoriis” chês che a monopolizin il concors.

Lis gnovis stradis pe musiche furlane si palesin propit tal Premi, dal jazz di autôr di Aiar di Tuessin, al grup punk rock dai Aneurisma, de cjançon rap *Cjargne Hip Hop* ae partecipazion di une band de Basse che in chel moment si clame Mitili Folk e di un cjantautôr cjargnel: Lino Straulino.

Tal 1989 si sdrume il mûr di Berlin e al cambie il mont. In cheste suaze al cambie ancje il Friûl, là che a tachin a sdrumâsi bariduris fisichis e ideologjichis, che achì a àn vût une presince massive e invadente. Propit in chest contest di mudament, al ven fûr chel che Max Mauro al clame “l'unic vîr moviment cuintriculturâl originâl nassût dentri te culture furlane daspò dai agns de contestazion”, ven a dî chel che si da dongje e

che al cres ator di *Usmis* (Mauro 2003: 51-52). La “riviste par gnovis culturis furlanis e planetariis” e je un barcon viert sul mont des diversitâts e des identitâts in moviment e duncje sul Friûl. *Usmis* e devente une bachete di rabdomant colective che e jude a (tornâ a) ciatâ risultivis di creativitât, a cjapâ cussience di se e a inacuarzisi che ce che al è daûr a nassi e a cressi chenti al è sù par jù compagn di ce che al sucêt, par esempi, tal cjamph de musiche e de produzion culturâl, tal País Basc, in Ocitanie, in Sardegne, ma ancje in Slovenie e in dut il rest di chê che si clame ancjemò Jugoslavie, là che al esist un panorame musical une vore vivarôs, tra punk, new wave e sperimentazions variis.

Usmis e tire dongje talents, passions e ideis, si svicine a Onde Furlane e ae Radio i da, e i darà, energjiis fisichis e intetuâls gnovis. Cun di plui a son za un pâr di agns che a Udin al esist un Centri sociâl autogjestît, che al è ancje un puest dulà che si fasin concerts e incuintris e a rivin artiscj di ogni dontri. In chest sens al è une farie di produzioni locâls e une des croseris di chê rêt di entitâts, relazions e sogjets diferents che si fâs sù ator de Radio e di *Usmis* e che e à une atenzion particolâr pe musiche e pe creativitât in lenghe furlane.

E je, in gjenerâl, une bulidure di ideis, di projets. A saltin fûr grups gnûfs – Furclap e ’Zuf de Žur – che a disvilupin percors origjinâi tra tradizion e inovazion. A son occasions di confront diret tra artiscj che a doprin il furlan, public e musiciscj di fûr, dal rock al folk revival, dentri di rassegnes tant che Festintenda e Folkest, intant che Cormôr Salvadi al devente un gnûf spazi pe produzion culturâl furlane di avanguardie. Lis edizioni dai prins agns Novante de sezion “Cjançons” dal Premi Friûl si confermin un bon rilevadôr di dute cheste vivarositat: dai Mitili che a deventaran FLK ai Arbe Garbe e ai Bakan, di Pit Ryan and the Mad Men Blues ai Società di Macinazione e ai Fluidodinamika, des soluzions techno eletronichis di X4U aes primis rimis di DLH Posse, di Lino Straulino a Luigi Maierón e al trio Stefano Andreutti, Guido Carrara e Giulio Venier.

Cun di plui, fûr dal concors, in bande de radio e avonde dongje di *Usmis* al salte fûr il quartet hardcore punk dai Inzirli: la jessude dal lôr prin demotape dal 1993 e ven definide di Marc Tibaldi su *La Patrie dal Friûl* l’event plui impuantant di simpri te culture furlane, ancjemò plui de Biblie par furlan... (Mauro 2001: 23).

7. Musiche furlane fuarte e gnoove. In chest contest si palese la necessitat di stramudâ la formule origijinarie dal concors inmaneât di Radio Onde Furlane. Il Premi si specialize te musiche, nol promôf plui lis cjançons singulis ma al favoris e al sburte i projets plui struturâts, stant che al previôt une finâl dal vîf e al met in pali la realizazion di un cd. Al è cussì che e nas la etichete Musiche Furlane Fuarte: il so intindiment programatic al è chel di sapontâ ducj i projets “che a sburtin, che a sperimentin, che a disfin e a tornin a fâ la musiche e la lenghe furlane”.

Ator de metât dai agns Novante e esist une schirie di grups e di soliscj che a fasin musiche contemporanie di diviers gjenars e a doprin la lenghe furlane cun snait, cun capacitât, cun naturalece o cun chê di fâ sperimentazion. Il denominatôr comun di dutis chestis esperiencis, une vore diviersis daûr di plui ponts di viste, al è propit l'ûs de lenghe, che al devente une sorte di marcje par dute chê che di in chê volte e ven clamade, magari cuntune cierte aprossimazion, “gnoove musiche furlane”. Cheste definizion gjeneriche e cjape dentri pardabon un grum di esperiencis e espressions, simpri in moviment e in evoluzion e soredut simpri plui in stât di metisi in relazion cul rest dal mont: cu lis realtâts musicâls des nazionalitâts e des minorancis in Europe, ancie inte suaze di iniziativis tant che Suns e Liet International, cun musiciscj di ogni dontri e cul “Friûl fûr dal Friûl”, ven a dî i emigrants furlans e i lôr fîs e dissidents, che a scoltin Onde Furlane par internet, che a inmanein concerts di grups furlans o che a metin adun projets musicâi doprant ancie la lenghe furlane (Diari de Argentina y Uruguay 2007; Stolfo 2011b: 132-135).

In cont di cheste realtât, là che di passe doi decenis il furlan si misclice cui suns, i ritmis, lis lenghis, i lengaçs e i stüi plui diviers, tai ultins agns si à tacât a studiâ e a scrivi. Par une tratazion plui in detai si rimande propit a chescj lavôrs (Cantarutti 2005; Gregoris 2008; Gregoris 2013; Ioime 1999; Stolfo 2011a; Stolfo 2011b; Stolfo 2012b; Stolfo 2012c) e chi si limitìn a menzonâ dome cualchidun di lôr. I Mitali FLK (e par un pôc dome FLK) si pues calcolâju une sorte di bandiere di dute cheste situazion, dongje di Lino Straulino, cemût che o vin za ricuardât. In cont de cjançon di autôr a son tancj altris che a doprin il furlan in maniere creative, a tacâ di Loris Vescovo e Renzo Stefanutti e dal bluesom Fabian Riz, intant che al va indenant ancie il percors inviat di Luigi Maierón.

La vivarositat e je grandonone soredut tra i grups, a tacâ dai Arbe

Garbe, che il lôr non al devente sinonim di “rock par furlan”, in graciis di une misture sauride di folk e punk cence compromès, che cumò e cjape sù ancje dal free jazz e dal rock indipendent sperimental, che e sa di Friûl, Irlande, Balcans e Americhis e che si combine cun furlan, sloven, spagnûl e talian. Une altre band fondamentâl e je chê dai Kosovni Odpadki, un pôc fîs e un pôc fradis di 'Zuf de Žur e Arbe Garbe, che a deventin il grup di ponte de comugne furlane e babeliche tai prins agns dal gnûf secul cu la lôr patchanka fûr dai schemis.

Il furlan al è doprât ancje pal rock plui ruspiôs o che al cjape ispirazion des tindincis che si fasin indenant ator pal mont, dai Pantan ai JoNoKognòs, dai Bakan ai Prorastar, fintremai al progetto intercontinental di Guido Carrara, la Bande Tzingare, ai cjargnei Mig 29 Over Disneyland o ai Luna e Un Quarto, a mieze strade tra Miti FLK e Arbe Garbe, tra cjançon di autôr e pop rock. E je ancjemò presinte une rieste di grups che, dilunc dal troi viert di Sedon Salvadie e Furclap, si movin tra il folk revival e un rock adult e tecnic (Carantan, Nosisà, Braul, Strepitz...) e ancje il jazz al torne a cjapâ sù il furlan cun Glauco Venier e U.T. Gandhi.

La cjançon furlane e je ancje femine, di Silvia Michelotti a Priska, e si esprim cui lengaçs dal hip hop, cui DLH Posse e i Carnicats, dal reggae e dal dub, cun DJ Tubet e R-esistence in Dub, e cul miscliç di sunôrs analogijs e digijitâi, tindincis gnovis e rock, créat dal progetto Madrac. Par no fevelâ des relazions tra musiche e letarature: des citazioni di Pier Paolo Pasolini ai viers di Federico Tavan, di Pierluigi Cappello, di Ermes di Colorêt e Leo Zanier, fintremai al moviment dai Trastolons che al ten dentri poetis e musiciscj e là che al è dificil fâ une distinzion tra poesie e cjançon.

A van zontadis ancjemò dôs considerazions.

La prime e tocje la capacitât di tancj protagoniscj de musiche furlane gnove e fuarte di metisi in rêt cun artiscj e situazions di altris bandis dal mont, tra manifestazions internazionâls tant che Liet International e Suns, festival european nassût in Friûl tal 2009, e colaborazions cun musiciscj talians, amerecans e di altris puerescj ancjemò. Cussì la lenghe furlane in musiche e ven puartade ator pal mont e ancje cjantants forescj le doprin tal lôr repertori: di Alice, che ancjemò tal 1989 e veve registrât la cjançon vincidore dal Premi Friûl dal an prime, *Anìn a grîs*, ae innomenade cjantante jazz Norma Winstone, partner vocal di Glauco Venier, passant pe cult-band britaniche In the Nursery, che tal so disc *Lingua* si cjate une

version di *Bielo Dumlo di Valôr*, metude adun cul cjantant e scritôr Checo Tam, pal grup sart dai Askra, cu la sô version bilengâl di *Tu tramontis*, par Fabian Riz che al cjante la sô *Omp sul cunfin* cui Frontiera (ex Kina) di Aoste o par Antonella Ruggiero, vôs preseade dal pop talian, implicade tal projjet *Cjantâ Vilotis*, promovût dal Istitût culturâl ladin di Fasse (Stolfo 2011b: 125-128).

La seconde nus permet di ricuardâ che no dute la produzion musical par furlan dai ultins vincjecinc agns e jentre te “gnove musiche furlane”. Al è chest il câs de cjançon melodiche che e va daûr dal model talian e che e à vût un rilanç intai ultins agns, ancje in graciis di cualchi finanziament public. Di chest panorame specific, in gjeneral, no salte fûr une vision di Friûl e di furlan gnove e positive. Pluitost si respire la stesse atmosfere “minimaliste” di un ciert passât. Chest al vâl tal câs de riproposizion dal Festival della canzone friulana e di projets tant che chel dai BeâtLes: cun dut de sô preseabile struture di comunicazion e di marketing, te sostance – *Yellow Submarine* che al devente *Il Tratôr Zâl* al è un esempi in chest sens – al è plui dongje di une cierte ande parodistiche che dal rock par furlan o de “gnove musiche furlane” (BeâtLes 2002; Angeli 2004).

8. Dai furlans “salts onescj lavoradôrs” a chei “cjalts forescj e in-cjantadôrs”. Cul passaç de cjançon verticâl ae cjançon orizontâl, tai agns Setante, la lenghe furlane in musiche e tache a esprimisi intune maniere “altre” e soredut “alternative” rispiet ai stîi e ai contignûts che par dut il secul XX, fintremai a chel moment, a somein jessi i unics che i partegnin.

Cui cjançonîrs e cul Povolâr Ensemble, furlan e Friûl si cjatin tes cjançons intune forme divierse e alternative. Chest ategjament al ven definît in maniere programatiche propit di Giorgio Ferigo, cemût che si lei tai sfueis che a presentin i concerts dal Povolâr: “perché Zardini non ci va bene e Dario Zampa neanche” (Zogno 2012: 1, 23, 25). E je une cjolte di posizion là che e ven marcade la lontanance des visions di “negazioniscj” e “minimaliscj”, ancje se e pant un ategjament “positif” che nol ven esplicitât ad in plen. Che chest al sedi un percors in evoluzion lu conferme Alessandra Kersevan, in cont de ativitat dal “Canzonîr di Dael”, te sô testemoneance tirade dongje temp indaûr (Stolfo 2011a: 36, 168; Stolfo 2011b: 77).

Une elaborazion teoriche plui articolade e rive cu la ativitat di Onde

Furlane e soređut cun *Usmis*. E ven fate indenant une vision di Friûl, di lenghe furlane e di identitât che e je positive e radicâl, e je dentri dal mont di vuê e in chel stes e à elements di continuitât cun cierts ategjaments “positîfs” storics, de discuverte e de rileture di Tellini ae atenzion pontade su ce che si môf inaltrò in Europe, te culture e te politiche.

Dut chest si palese tal ategjament dai Mitili FLK, che za tal lôr non, cun cunvinzion e cun ironie, si definissin “Furlan Liberation Kongress”. Si pues definîlu “positîf critic” e al è chel stes ategjament che si cjate in altris esperiencis: dai Arbe Garbe ai Kosovni Odpadki, di Lino Straulino a Guido Carrara.

L'element plui fuart al è chel de sielte di doprâ la lenghe par fâ musiche, tant che risultive creative e risorse espressive e ancje cun chê di mostrâ che e je une lenghe “normâl”. Cun di plui une cierte cussience positive e salte fûr ancje dai tescj, soređut tal câs di Mitili FLK, Loris Vescovo, Pantan, Arbe Garbe, Bande Tzingare.

E je une cussience positive critiche e ancje problematiche, condizionade in part de mancjade scolarizazion par furlan e soređut dal scugnî vê a ce fâ ancjemò cun cierts prejudizis e cui efiets di agns e agns di chê *ideologia friulana* piturade di Maniacco.

Chest aspiet al tocje ancje la dimension politiche. La vision positive di Friûl e di furlan pandude di grups e soliscj e podarès jessi plui esplicite e cussiente in presince di interlocutôrs politics e culturâi in stât di esprimi in chei cjamps une vision compagne. Ma chescj no esistin o se a esistin no àn avonde credibilitât e atrat, probabilmentri cu la ecezion di Radio Onde Furlane e di ce che si môf ator di jê.

Par sigûr la produzion musical par furlan dai ultins vincjecinc agns e in particolâr la cussì clamade “gnove musiche furlane” e à fat indenant, un pôc cun convînzion e un pôc dome in maniere istintive, ategjaments che a van daûr di chê che le vin clamade vision positive di Friûl e di furlan e le àn ancje inzornade cuntun gnûf spirt, che ancjemò di plui al met in relazion il Friûl cul mont e duncje cun se stes.

Plui in gjenerâl la “gnove musiche furlane” si à zovade de lenghe e de sôs espressivitât e musicalitât e i à zovât ae lenghe, ae promozion dal so status, soređut tra i zovins. Il furlan in musiche al è deventât la lenghe di furlans “cjalts, forescj, incjantadôrs”.

Bibliografie

- Angeli F. (2004). Lenghe cjantade, lenghe sunade. *La Comugne Speciâl*, 13: 50-63.
- Begotti P.C., Cescje A. (1980). *La nazione Friuli*, vol. 2. Udin: Centro editoriale friulano.
- Canciani D., De La Pierre S. (1993). *Le ragioni di Babelè*. Milan: Franco Angeli.
- Cantarutti P. (2005). La musica friulana moderna. In Fabbro F. (cur.) *La Patrie dal Friûl*. Rome: Lor. Enz, pp. 167-180.
- Cavallo Z., Cescje A. (1980). *La nazione Friuli*, vol. 1. Udin: Centro editoriale friulano.
- Chiurlo B. (1922). *La funzione storica del Friuli*. Udin: Carducci.
- Cossar N. (2010). Rinasce il Festival della canzone friulana: chiamati Maieron, Tubet, Giavitto e Straulino. *Messaggero Veneto*, 13 marzo 2010: 13.
- Cuale lenghe pe gnove musiche furlane* (2005). Udin: Musicologi.
- D'Ancona A., Bacci O. (1906). *Manuale della letteratura italiana*. Florence: Barbera.
- Diari de Argentina y Uruguay* (2007). Udin: Forum.
- DAF. *Dizionario autonomistic Furlan* (2009/2012). Udin: Istitût ladin furlan "Pre Checo Placerean". <http://www.istitutladinfurlan.it/daf>
- DBF. *Dizionario Biografico Friulano* (2001). Udin: Ribis.
- Ellero G. (2004). *Lingua, poesia, autonomia. Il Friuli autonomo di Pier Paolo Pasolini*. Tavagnà: Istitût Ladin-Furlan "Pre Checo Placerean".
- Ellero G. (2005). Profilo della Società Filologica Friulana. In Fabbro F. (cur.) *La Patrie dal Friûl*. Rome: Lor. Enz, pp. 337-342.
- Ermacora C. (1928). *Piccola Patria*. Udin: La Panarie.
- Ferigo G. (1999). *In forma di peràulas... Cjançonetas 1971-1988*. Tumieç: Coordinamento circoli culturali della Carnia.
- Frau G. (1989). *Individualità linguistica del friulano*. Udin: Institut di Studis Furlans.
- Gregoris L. (cur.) (2008). *Suns. Antologie de gnove musiche furlane*. Vol. 1 > '98. Udin: Nota.
- Gregoris L. (2013). Note e materiali per una storia della canzone recente in lingua friulana = Notis e materiáli par une storie de cjançon resinte in lenghe furlane. In Rizzolati P. (cur.) *I filoni originali. Studi e ricerche sul Friuli promossi dal CIRF* =I filons originâi. *Studis e ricerchj sul Friûl promovûts dal CIRF*. Udin: Forum, pp. 77-80.
- Heinemann S. (2007). *Studi di linguistica friulana*. Udin: Consorzio Universitario del Friuli.
- Iannàccaro G., Dell'Aquila V. (2004). *La pianificazione linguistica. Lingue, società e istituzioni*. Rome: Carocci.
- Ioime A. (1999). Musiche Novante. *La Comugne*, 5: 59-64.
- Kersevan A. (cur.) (2001). *Amalârs. Antologje de leterature furlane*. Udin: KappaVu.
- Londro I. (2008). *Pa sopravivence, no pa l'anarchie. Forme di autogestione nel Friuli terremotato: l'esperienza della tendopoli di Godo (Gemona del Friuli)*. Udin: IFSML-Forum.
- Maniacco T. (1995). *L'ideologia friulana*. Udin: KappaVu.
- Maniacco T. (1996). *Breve storia del Friuli dalle origini ai giorni nostri*. Rome: Newton & Compton.
- Marchet J. (1994). *Cuntristorie dal Friûl*. Udin: Clape Culturâl Aquilee.
- Mauro M. (2001). *Inzirli. Una storia per caso*. Udin: Snaibuchs.
- Mauro M. (2003). *Un Friûl difarent. I 90 Mbz di Radio Onde Furlane*. Montréal: Il Menocchio.
- Mauro M. (2005). Giornalismo. In Fabbro F. (cur.) *La Patrie dal Friûl*. Rome: Lor. Enz, pp. 233-238.
- Menis G.C. (1996). *I friulani, un popolo d'Europa*. Udin: Ente Friuli nel Mondo.
- Menis G.C. (2009). *Storia del Friuli*. Udin: SFF.
- Paluzzano R., Pressacco G. (1998). *Viaggio nella notte della Chiesa Aquileiese*. Udin: Gaspari.
- Pascolini M. (2005). *Geografia e paesaggi del Friuli*. In Fabbro F. (cur.) *La Patrie dal Friûl*. Rome: Lor. Enz, pp. 9-15.

- Pressacco G. (2002). *Canti nelle notti friulane (libro + cd)*. Pordenon: Biblioteca dell'Immagine.
- Pressacco G. (2002). *L'arc di San Marc. Opera omnia*. Vol. I, parte I. Pordenone: Biblioteca dell'Immagine.
- Pressacco G. (2004). *L'arc di San Marc. Opera omnia*. Vol. parte II. Trieste: Gogliardica.
- Pressacco G. (2006). *Sermone, cantu, choreis et marculis. Cenni di storia della danza in Friuli*. Udin: Forum.
- Piovene G. (1957). *Viaggio in Italia*. Milan: Rizzoli.
- Roseano P. (1997). *Identità friulana. Così è e così l'hanno prodotta i miti, i parroci, le élite locali*. Gurize: ISIG.
- Rossi B. (1979). *La musica in Friuli*. Udin: Ribis.
- Rossi B. (2009). *"Il çant dal Friûl". Dischi e registrazioni storiche in Friuli*. Udin: USCI/Pizzicato. (Cun cd).
- Salvi S. (1975). *Le lingue tagliate. Storia delle minoranze linguistiche in Italia*. Milan: Rizzoli.
- Stolfo M. (2010). Des visions diviersis di furlan e Friûl ae normative di tutele. *Gnovis Pagjinis Furlanis*, XXVII: 57-67.
- Stolfo M. (2011a). *La mè lenghe e sune il rock (e no dome chel). Friûl, Europe*. Udin: Informazione friulana. (Cun cd).
- Stolfo M. (2011b). *Occitania, Friuli, Europa. La mia lingua suona il rock*, Turin/Udin: Lidrîs e Butui. (Cun cd).
- Stolfo M. (2012a). Ensemble... Musica etica. In Zogno T. (cur.) *Giorgio Ferigo & Povolâr Ensemble*. Udin: Forum/Associazione Giorgio Ferigo, pp. 10-36.
- Stolfo M. (2012b) (cur.) *Suns 2. Babèl. Antologie de gnove musiche furlane*. Udin: Nota. (Cun cd).
- Stolfo M. (2012c) (cur.) *Suns 3. Sclesis. Antologie de gnove musiche furlane*. Udin: Nota. (Cun cd).
- Stolfo M. (2014). *La minoranza linguistica friulana e la sua (non?) tutela*. (in stampe)
- Strassoldo R. (1996). *Lingua, identità, autonomia. Ricerche e riflessioni sociologiche sulla questione friulana*. Cjampfuarmit: Ribis.
- Tellini A. (1991). Il prin program natsionalitari furlan. *Usmis*, 3: 9.
- Toffoli D. (2007a). Lotta di liberazione e questione friulana. *Storia contemporanea in Friuli*, 37/38, XXXVII: 61-71.
- Toffoli D. (2007b). La patrie ladine. Cualchi note su la figure di Achille Tellini. *Ce fastu?*, 83: 141-148.
- Ulliana F. (1982). *Tornare con la gente : clero e identità friulana*, Udin: Il Campo.
- Vezzi C. (1995). *Amato Matiz "Pakaj". Un om e la sô armoniche*. Cleulis: Circolo ricreativo.
- Vicario F. (2005). *Lezioni di linguistica friulana*. Udin: Forum.
- Vicario F. (2013). *Lineaments di leteradure furlane*. Udin: Forum.
- Zampa D. (2010). La Scuele Libare e il maturare di una coscienza. *Messaggero Veneto*, 13 marzo 2010, p. 13.
- Zogno T. (cur.) *Giorgio Ferigo & Povolâr Ensemble*. Udin: Forum/Associazione Giorgio Ferigo. (Cun 4 cd).

Discografie minime

- AA.VV. (2003). *Misture*. Musiche Furlane Fuarte.
- AA.VV. (2010). *Brovade e muset Light*. Musiche Furlane Fuarte.
- Arbe Garbe (2007). *Live in Festintenda*. Musiche Furlane Fuarte.
- BeâtLes (2002). *Il tratôr zâl*. Miluç.
- Bintars (1978). *Des Valadis dal Nadison*. AVF.
- Canzoniere Popolare di Aiello (2000). *In onôr in favôr/ Duej o cuasit* (rist.). AVF.
- DLH Posse (2001). *Hip Hop Instêz*. Musiche Furlane Fuarte.
- Doganîrs (1999). *Notne igre – Notenspiel*. AVF.
- Driussi E. (1982) *Sporcacjonis*. AVF.
- FLK (2007). *Re Noir*. CNI.
- Folketitrai (1980). *Bacco, Salût e Amôr*. AVF.
- Inzirli (2001). 1990.96. Musiche Furlane Fuarte.
- Kosovni Odpadki (2004). *Bye Bye Bombe*. Alfa Music – Rai Trade.
- Luna e un Quarto (2011). *Basse pression*. Musiche Furlane Fuarte.
- Madrac (1999). *Technotitlan*. Musiche Furlane Fuarte.
- Maieron L. (2011). *Vino Tabacco e Cielo*. PDT / Universal.
- Merlot T. (2001). *Vincej agns di Merlot*. AVF.
- Mig 29 over Disneyland (2011). *2 plui 2 nol fâs cuatri*. Musiche Furlane Fuarte.
- Mitili FLK (1993). *Ratatuie*. Nota/Onde Furlane.
- Mitili FLK (1995). *Colôrs*. Nota.
- Pantan (2012). *Kistalè*. Nota.
- Popovič (1979). *Folk Popovic*, vv. 1, 2 e 3. AVF.
- Riz F. (1999). *Bolât*. Musiche Furlane Fuarte.
- Straulino L. (2005). *Spin*. Nota.
- Straulino L. (2010). *L'Alegrie*. Nota.
- Straulino L. (2012). *Mosaic*. Nota.
- Vescovo L. (2002). *Stemane ulive*. Nota.
- Vescovo L. (2008). *Borderline*. Nota.
- Venier Gl. (2008). *Distances*. ECM.
- Trio Pakaj (1979). *Baronadis*. AVF.
- Zampa D. (1975). *Mandi vecjo Friûl*. Friûl.
- Zampa D. (1978). *Sperance*. Friûl.
- Zampa D. (1979). *Poesie*. Friûl.
- 'Zuf de Žur (2004). *Partigiani*. FinisTerraE.